

## Kálag e'só eche Jɔnɛ Ndibned n kálag

Metɔte méde mébe míme mékǎá bon Jɔnɛ átɛl kálag e e'só. Atɔte dé e'só ádíi áwéd bad ábe áténlé chó nlém á abum ábel bébê mod nhóg ne Dyõb ne awe Mwǎn, Yesu Krístæ.

Metɔte míme mélónténé mébe médii, Jɔnɛ alánge bad ábe áténlé chó aá bétéd pónde ne ayáge dé metóm ayále débēbēd abé áde bédíi mod nhóg ne Dyõb ne Yesu Krístæ. Adê ayáge dé metóm áhóbe nén bán ebébtéd épag ne abé áde moonyon abágkē á nkõnsé tē, bán né-ɔó, Yesuɛ, Mwǎn a Dyõb eéhele' aá-se ákõn moonyon abé. Abê bemeléede bé metóm béhóbe nén bán nzé mod ákũd e'sooson, atánjéné nēe ábáá mekan mé nkõnsé á yǎl. Báyágte ámpē nén bán e'sooson béewóó' é dyamdyam ábel ne abé á bwám ne áwón edánge ne nhóg ne aníníí.

Alúmed aá adê ayáge déetángeɛé Jɔnɛ alúmté á kálag tē wén aá Yesuɛ ankõn moonyon abé akoó- 'é alúmed áte nén aá bad ábe bédúbpe Yesuɛ bon bédān-'é Dyõb bétánjéné nēe bédáá nhóg ne aníníí.

### **Nkabtéd n kálag**

Ndibned 1.1-4

E'nyínen bé ekíde ne ehíntén 1.5-2.29

Bǎn bé Dyõb ne bǎn bé Satanɛ 3.1-24

Mbále ne awusé 4.1-6

Chõm éche edánge édíí 4.7-21

Adúbe áde átómé mekan mésyāal áte 5.1-21

### *Eyale é alongé*

<sup>1</sup> Ntenle' nyé tãngene ane awě adé Eyale é Dyõb éche épεene' alongé. Abédé se á mbooted, sênwóg mam tãngene mó, sennyínén mó mĩd, sêmbán mó dĩd áyāl, sêmbán-ne mó ekaá á yāl. <sup>2</sup> Mó awě apεene' alongé antĩm moonyon awě bényinnéé dĩd, dennýn-ne mó. Sêbĩde' mó mbón, sélãngē-'ε nyé mam tãngene mó awě abage' alongé áde déemaá', mó awě ambé ne Titéε, bon átĩm abyéén átĩnté echêd. <sup>3</sup> Chõm éche sényiné, éche séwógé-'ε, chõ sélãngéé nyé, ábel bon nyébê nlatén ne sé. Mmēd nlatén-ne nĩdĩ nlatén nĩme déwóó ne Titéε ne awe Mwãn Yesu Krĩstæ. <sup>4</sup> Sêtelé enén kálag, ábel bon nĩmēd menyĩge mélõn mbon.

### *Alongé á bad ábe bédé á e'nyĩnen bé ekĩde*

<sup>5</sup> Bõb-põó, póle echě séwógé á nsal wéε Yesu Krĩstæ bon sélãngē-'ε nyé edĩi nén, Dyõb ádĩi e'nyĩnen bé ekĩde. Atõn dé mbéb ké ahóg déesaá mó á yāl. <sup>6</sup> Nzé dehóbé bán dedé nlatén ne mó áde alongé ádēd ádĩi ádĩi alongé dé ehĩntén, né dekale metóm né nĩme syánē mbeltéd-te méēhĩdēē mbále. <sup>7</sup> Bon nzé dewóó alongé dé e'nyĩnen bé ekĩde ngáne Mwēn-ne ámpē áwóó, né syánē dēēbē nlatén ne nhóg ne anĩnĩ, mekiĩ nĩme Yesuε awe Mwãn, mó-'ε méwobé nĩmesyánē mbéb nĩsyāāl.

<sup>8</sup> Nzé dehóbé bán deewóó'ε atõn dé mbéb ké ahóg á yāl, né dedoge' échēd yāl, né mbále-'ε eesaá syánē áte. <sup>9</sup> Nzé depanle' nĩmesyánē mbéb áte, né ábēl ngáne áhóbé, ábēl-le chõ nyaa echě etãngéné. Alagsén syánē mbéb, áwõbē-'ε nĩmesyánē mbéb nĩsyāāl. <sup>10</sup> Nzé dehóbé bán deēbeléé mbéb, né

dehóbe' bán Dyöb ádíi nkal a metóm, né eyale é Dyöb éesaá-'áá syánē áte.

## 2

### *Jone ad Krístæa mó adé awesyánē Nwõngene*

<sup>1</sup> Nyé ábe nyêdé nêngáne ábêm bán, ntenle nyé enén kálag, ábel boŋ nyéebēlē mbéb. Boŋ nzé mod abelé mbéb, syánē dewóó mod awě abele' mekan míme métáŋgéné, Yesu Krístæa. Mó achâŋge' syánē Titée. <sup>2</sup> Krístæa mwěŋ-éé ambé nêngáne nde echě Dyöb dēmbenlédte ákade syánē áyāl e mbéb míme dēmbenlé. Ambel nê ábel dékud alagsen. Saá-kaá mbéb mímesyánē mēmpen, boŋ mbéb míme bad bé nkõŋsé bésyāāl.

<sup>3</sup> Nzé dehíde' mbéndé é Dyöb né édé mbále bán debíí mó. <sup>4</sup> Kénzéeé awě ahóbé áá móbīí mó, boŋ eehíde' éche mbéndé, né ene ndín e mod adíi nkal a metóm, né mbále ké póg eesaá-'áa mó áte. <sup>5</sup> Boŋ kénzéeé awě abele' ngáne eyale é Dyöb éhóbéé, edaŋge éche ene ndín e mod ádáá Dyöb élóne' mbon. Nén dáo ábele' boŋ debíí ne mbále bán dedé ne Dyöb. <sup>6</sup> Kénzéeé awě ahóbé áá módē ne Dyöb, áde alongé átáŋgéné abé nêngáne alongé áde Yesu Krístæa.

### *Mbéndé e ekóólé*

<sup>7</sup> A-baányan bé edaŋge, enén mbéndé echě íntenléé nyé eesaá mbéndé e ekóólé, edíi mbéndé e nchun echě nyénwõngē se á mbooted. Enén mbéndé e nchun edíi nkalan mí bwám míme nyémáá awóg. <sup>8</sup> Boŋ kénê, mbéndé e ekóólé cháo íntenléé nyé bōōb, mbále echě edé-'e á mbéndé-te wê, enyínnédé á alongé áde Krístæa, enyínnéd-te

á alongé ádēn, áyāle nēn ehintēn ébóótédé amaa, e'nyínēn bé ekíde é' mbále é'máá abooted dé apen.

<sup>9</sup> Kénzée awě ahóbé aá módē á e'nyínēn bé ekíde boŋ ákōō mwānyan, ene ndín e mod adii adé á ehintēn-tē. <sup>10</sup> Kénzée awě adə́ mwānyan adé á e'nyínēn bé ekíde-tē. Né-ə́, ene ndín e mod éēbēlēē dyamdyam áde ábēlte' bad bēmpēe mbéb. <sup>11</sup> Boŋ kénzée awě akə́ mwānyan, awóó alongé dé ehintēn. Ene ndín e mod akag á ehintēn-tē eebyée-'aá wēē ákagké áyāle ehintēn ébélé adé nēē mod awě akwedé ndím.

<sup>12</sup> Nyé ábe nyédé nēŋgāne ábēm bān, ntenle nyé áyāle Dyōb álágséné nyé mbéb á dīn áde Yesu Krīstə́. <sup>13</sup> A-besān, ntenle nyé áyāle nyébíí ane awě adé se á mbooted. A-kódébad, ntenle nyé, áyāle nyétómé ane awě adé ebébtéd áte.

<sup>14</sup> A-bānbān, ntenle' nyé áyāle nyébíí Titée. A-besān, ntenle nyé, áyāle nyébíí ane awě adé se á mbooted. A-kódébad ntenle nyé, áyāle nyēwúú áte, eyale é Dyōb édé nyé áte nyétómé-'e ane awe adé ebébtéd áte.

<sup>15</sup> Nyéēdə́ nkōŋsé ké'ε bwēm ábe é'dé áwēd-te. Nzé mod adə́ nkōŋsé, né eédə́'ε Titée. <sup>16</sup> Bwēm é'syā́l ábe é'dé á nkōŋsé te, nédē bwēm ábe moonyon a ekob áwóó'ε esíí áte, bwēm ábe mīd médə́'ε anyín ne bwēm ábe bad békumnēé ekáá á tāl, béēhúu'ε ne Titée, é'díi bwēm bé nkōŋsé. <sup>17</sup> Nkōŋsé ne ábe bwēm é'syā́l ábe baányon bēwóó'ε esíí áte áyāl echáb, nítóme tómén, boŋ mod awě abele' ngāne Dyōb áhēdēé, abāg ne Dyōb á ngíndé ne á ngíndé.

*Jõne ad nyétêd pónde  
ne bad ábe bétâᅇgan Krístæ*

<sup>18</sup> A-bãnbã, asóg ákwógé apɛ. Bénlā nyé bán Mod a Ekɔyí awě Krístæ äpě, bɔɔb-pe bad bé ekɔyí híin ábe Krístæ bé máá apɛ. Né-ɔó, debíi bán asóg ákwógé apɛ. <sup>19</sup> Abê bad bénkênkoᅇgé bad abé ábe bédé nímesyánē nlatén, né-'áá dênkǎᅇ boᅇ bétēdē syánē. Nzé bém̄bē bad ábe bédé áwesyánē nlatén, né bém̄bē bébé ne syánē, boᅇ bēnchené syánē ábel boᅇ ényínned ne mbále nén bán bénkênkoᅇgé abé ne syánē. <sup>20</sup> Boᅇ ne nyé, Ane-awě-Béwógté abagé nyé Edæádəᅇ éche Esáá. Né-ɔó, nyé moosyáál nyébíi mbále. <sup>21</sup> Meétēnlē nyé enén kálag áyāle nyéebíi' é mbále, boᅇ ntenle' nyé ch́ó áyāle nyébíi mbále, nyébíi'-é nén bán metóm ké mehóg méēbídē á mbále-tê. <sup>22</sup> Nzéé-'ō adé nkal a metóm? Nkal a metóm adíi kénzée awě ahóbé áá, Yesue eésáá Ane awě Dyöb Áwógté. Ene ndín e mod ch́ó edé Mod a Ekɔyí awe Krístæ, abáa' Titée á yǎl, ábāā-'é Mwǎn. <sup>23</sup> Mod éēhēlē-se abáᅇ Mwǎn a Dyöb á yǎl se abé ne Titée. Kénzée awe akobé Mwǎn a Dyöb, akobé kááᅇne Titée. <sup>24</sup> Nyényín nén bán nkalaᅇ níme nyéwógé se á mbooted rídé nyé áte. Nzé nkalaᅇ níme nyéwógé, rídii rídé nyé áte, né nyémpē nyéēbē ne Mwǎn a Dyöb nyébé-'é ne Titée. <sup>25</sup> Chóm éche Krístæ áhóbé áá mós̄bē syánē édii alonᅇgé áde déemaá'.

<sup>26</sup> Ntenle nyé nímén mam áyāle bad bédé ábe béhede nyé adog. <sup>27</sup> Boᅇ ne nyé, Krístæ abagé nyé Edæádəᅇ éche Esáá. Abé áde échē Edæádəᅇ édii nyé áte, nyéetógnenē modmod áyáged nyé. Echē edæádəᅇ éyágte nyé mam mésyāál, mam níme éyágte-'áa nyé médé mbále, méesaá metóm. Né-ɔó,

nyébê nyébê ne Krīstəa ngáne Edəádəŋ éche Esáá éyágté nyé.

<sup>28</sup> Bəəb-pəó, a-bănbān, nyébê mod nhóg ne mó, âbel boŋ epun éche áπεέ, nlém íwúu syánē á abum, deewógé-’ε e’sôn âtyéem mó á’sō. <sup>29</sup> Nyébíí bán Krīstəa abele mekan níme métəŋgéné á’sō é’ Dyöb, né-əó, nyébíí bán kénzée awě abele’ mekan níme métəŋgéné, adíi mwän a Dyöb.

### 3

#### *Jone ahóbé ngáne alongé áde bán bé Dyöb átəŋgéné abé*

<sup>1</sup> Nyényín ndín e edəŋge echē Titée ádáá syánē. Echē edəŋge échábé ámín kóəŋ béchəge syánē bán bán bé Dyöb, bən-naá dékóó abé. Nzəm echē ekəá boŋ bad bé nköŋsé béebíi syánē edíi áyāle béēsēbπεέ Titée abíi. <sup>2</sup> A-baányəŋ bé edəŋge, syánē dedíi bán bé Dyöb bəəb. Eēbyēēnēē hwām pən chöm-ée syánē débēē. Boŋ debíí bán pónDé echē Krīstəa áπεέ, syánē déēbē nēŋgáne mó, áyāle nén deényín mó ngáne adíi. <sup>3</sup> Kénzée awě asumé nlém wée Krīstəa átəŋgéné née asánté eche yäl ngáne Krīstəa mwən ámpē ásáá.

<sup>4</sup> Kénzée awě abelé mbéb, akwedé nkáá áyāle abóó mbéndé e Dyöb. Mbéb ídíi abóó á mbéndé e Dyöb. <sup>5</sup> Nyébíí bán epε éche Krīstəa ámpεé á nköŋsé ébedée ámad mbéb. Krīstəa mwən-ne eewóó’é mbéb ké nhóg á yäl. <sup>6</sup> Kénzée awě adé ne Krīstəa éēbēlēē mbéb. Kénzée awě abele mbéb, eenyínée Krīstəa eebíi-’áa mó.

<sup>7</sup> A-bănbăn, nyéēmwāg se mod ádog nyé. Kénzée awě abele mekan níme métəŋgéné adíi

mod awě abele mekan níme métǎngéné á'sō é' Dyöb, ngáne Krístǎ abeléé mekan níme métǎngéné. <sup>8</sup> Kénzée awě abele mbéb, adii mwǎn awě Devǎle áyǎle Devǎle ambootéd mbéb abel sé á mbooted. Nzǎm echě enkǎñ boñ Mwǎn a Dyöb ápē á nkǎñsé, ebédée ábébed nsón níme Devǎle ábélé. <sup>9</sup> Kénzée awě adé mwǎn a Dyöb, éēhēlēē'ε-se ábélé mbéb áyǎle Dyöb dǎǎ adé mó Sáá. <sup>10</sup> Chǎm éche ékoo' syánē alúmed bad ábe bédé bǎn bé Dyöb ne ábe bédé bǎn bé Satan édii nén bǎn, bad ábe béebelé' mam níme métǎngéné ne bad ábe béedǎ baányañ bé Krísto, béesaá bǎn bé Dyöb.

### *Joñe ad bad bédǎñ nhóg ne aníní*

<sup>11</sup> Nkalañ mí bwâm níme nyénwǎgkē se á mbooted mbédée nén bǎn, dédǎñ nhóg ne aníní. <sup>12</sup> Deebág née Keene. Keene abédée mod awě Satanε, anwúú'ε mwǎnyañ. Cheé ênkǎñ boñ Keene awúú mwǎnyañ? Anwúú mó áyǎle mekan níme mwěn ábélé'áá mébédé mam mé mbéb boñ níme mwǎnyañ méntǎngēn á'sō é' Dyöb. <sup>13</sup> Né-ǎǎ, a-baányañ, nyéebág menyáké ngáne bad bé nkǎñsé békǎǎ nyé. <sup>14</sup> Dedǎǎ bǎnned bé Krísto bémpēe, nē dǎǎ ábélé boñ debíí bǎn dehǎdté áse e ngíne e kwééd dekudé alongé áde déemaá'. Kénzée awě eédǎǎ bǎnned bé Krísto bémpēe, alyagé adé áse e ngíne e kwééd. <sup>15</sup> Kénzée awě akǎǎ mwǎnyañ a Krísto, adii mod a ewúen, nyébíí'ε nén bǎn alongé áde déemaá' déesaá mod a ewúen ké nhóg áte. <sup>16</sup> Krístǎ ambě áde alongé á nló nímēd. Nén dǎǎ ábélé boñ debíí chǎm éche edǎnge édíí. Né-ǎǎ, syánē ámpē detǎngéné née débágé áde alongé á

nló míme bãnned bé Krısto bémpēe. <sup>17</sup> Nzé mod adé awě adé nhɔn, boŋ anyíné mwǎnyan awě atóge' boŋ eewóo nlém mí bwâm ǎwóngeɲ mó, chán áhɛlesɛ ahób aá módəə Dyöb? <sup>18</sup> A-bǎnbǎn, edəŋge éche déwánléné nhóg ne aníníí, éetəŋgeɲéé abé dásō á nsəl-tê ne á póle boŋ étəŋgené abé á mbeltéd ne á mbále-tê.

*Jone ahóbé chǝm éche ébele'  
boŋ deewógé mbwóg á'sō é' Dyöb*

<sup>19</sup> Nzé delúmté nhóg ne aníníí edəŋge, né debíí bán dedé bad bé mbále ne debíí-ε bán nlém méwūū syánē á abum á'sō e' Dyöb. <sup>20</sup> Póndé ké ehéé echě nímēd mewēmtɛn mélánge syánē bán debelé mbéb, debíí bán Dyöb ábíí mam mésyāēl tómaa ngáne syánē débíí. <sup>21</sup> A-baányan bé edəŋge, nzé mímesyánē mewēmtɛn méēlánge syánē bán dedíí bebel bé mbéb, deewógéé mbwóg ké nhóg nzé dekǎnne' á'sō é' Dyöb. <sup>22</sup> Dekude kéchéé éche désédté mó áyāle dehíde' éche mbéndé débélé-ε mam míme méwógte mó menyinje. <sup>23</sup> Mbéndé echě ábágé, edíí nén, dédúbe á đín áde awe Mwǎn Yesu Krıstəə, dédəŋ-ε nhóg ne aníníí. Melemlem mé mbéndé mós Krıstəə mómpē ǎmbéé syánē. <sup>24</sup> Kénzéé-ε awě ahíde' mbéndé é Dyöb, abág mod nhóg ne Dyöb, Dyöb-pe ábē mod nhóg ne mó. Nén dś-'aá débéléé boŋ debíí bán Dyöb ádé ne syánē. Debíí ǎned áyāle Édəədəŋ éche ábágé syánē.

## 4

*Jone ahóbé aá bad bétéd  
póndé ne e'dəədəŋ bé metóm*



<sup>1</sup> A-baányan bé edənge, nyéedúbpé bad bésyāā́l ábe behóbe' bán béwóó Edáádəŋ é Dyöb. Bon pen, nyékəg bó ábíi nzé edáádəŋ éche édé bó áte éhúú ne Dyöb. Nyékəg bó áyāle ekud é bekal bé'dáádəŋ bé metóm bépédé á nköŋsé-te. <sup>2</sup> Chöm éche wébeŋlé bon ebíi mod awě Edáádəŋ é Dyöb édíi áte édíi; kénzéé awě ahóbé aá Yesu Krístə́ apedé á nköŋsé néε moonyon, né ane mod awóó Edáádəŋ é Dyöb. <sup>3</sup> Bon kénzéé awě ahóbé aá Yesu eépedeé á nköŋsé néε moonyon, eewóó' é Edáádəŋ é Dyöb áte. Edáádəŋ éche ene ndín e mod áwóó áte édíi edáádəŋ éche ehúú ne Mod a Ebébtéd. Nyēnwóg bán échén edáádəŋ épě, bəəb-pe é máá ape á nköŋsé-te.

<sup>4</sup> A-bānbān nyédíi bad bé Dyöb, nyétómé-'ε ábē bekal bé'dáádəŋ bé metóm áte, áyāle Edáádəŋ éche édé nyé áte édé ngíne tómaa Satanε awě akamlan bad bé nköŋsé. <sup>5</sup> Abē bekal bé'dáádəŋ bé metóm bédíi bad bé nköŋsé, né-ɔ́, mekan míme behóbéé médíi mekan mé nköŋsé, bad bé nköŋsé-'ε béwóglan bó. <sup>6</sup> Syánē dedíi bad bé Dyöb. Kénzéé awě abíi Dyöb awóglan syánē, kénzéé-'ε awě eesē mod a Dyöb, eewóglanné syánē. Né-ɔ́, nén dɔ́ mod áhele abíi nhəŋlén átíntē e Edáádəŋ é mbále ne edáádəŋ é metóm.

### *Jone ad Dyöb adás syánē*

<sup>7</sup> A-baányan bé edənge, dedəŋ nhóg ne aníníi áyāle nén edənge éhúú ne Dyöb. Kénzéé-'ε awě adáá mwānyan a Krísto adíi mwān a Dyöb, abíi-'ε Dyöb. <sup>8</sup> Kénzéé awě eédəə baányan bé Krísto, eebíi' é Dyöb, áyāle kéchéé éche Dyöb ábeleé é lúmté' edənge éche áwóŋné bad. <sup>9</sup> Dyöb álúmté syánē

edəŋge ne nén, alómé mímé mpəm ní Mwän á nkõŋsé-te ábel boŋ dékud alongé áde déemaá' mb-wiined ne mó. <sup>10</sup> Chõm éche édé edəŋge édíi nén, saké bán syánē dedəá Dyõb, boŋ nén Dyõb ádáá syánē, anlóm-me awe Mwän ákəde syánē áyāl e mbéb míme débélé.

<sup>11</sup> A-baányan bé edəŋge, ngáne édíi bán Dyõb átómténé syánē adəŋ, syánē ámpē detəŋgéné dédəŋ nhóg ne aníníi. <sup>12</sup> Mod eényinēē Dyõb mbéd. Nzé dedəá nhóg ne aníníi, né Dyõb débē ne syánē, échē edəŋge-ε éche ádáá syánē élõn mbon.

<sup>13</sup> Nén dó-'aá débēl boŋ débíi bán syánē dedé ne Dyõb, Dyõb-pe ádé ne syánē, áyāle abagé syánē échē Edəádəŋ. <sup>14</sup> Syánē denyíné, deləŋge-ε bad bémpēe nén bán Titée alómé awe Mwän ábé Nsoode a nkõŋsé. <sup>15</sup> Bad ábe béhóbe' bán Yesue adíi Mwän a Dyõb, Dyõb ádé ne bó, bó-ε bédé ne Dyõb. <sup>16</sup> Né-ɔ́, syánē debíi, dedúbpe-ε edəŋge éche Dyõb ádáá syánē.

Kéchéé éche Dyõb ábeléé élúmte edəŋge éche áwóŋné bad, bad-te ábe edəŋge édíi áte, bédé ne Dyõb. Dyõb-pe ádé ne bó. <sup>17</sup> Edəŋge éche édé syánē áte, élóné mbon ne nén, nlém mēwū syánē áte á mbwe mé nkáásé, áyāle nén dedé mod nhóg ne Dyõb á nkõŋsé-te hén melemlen ngáne Krístə ámbēē ne mó. <sup>18</sup> Mod awē Dyõb ádáá eewógéé mbwóg. Edəŋge éche élóné mbon énane mbwóg rísyā́l. Abán dé nkógsén dɔ́ ápεene mbwóg. Né-ɔ́, kénzéé awē mbwóg rídíi áte, edəŋge éelónéé mó mbon áte. <sup>19</sup> Delúmte' edəŋge áyāle Dyõb ásébpé syánē edəŋge alúmed. <sup>20</sup> Nzé mod ahóbé aá módəá Dyõb boŋ akɔ́ mwānyan a Krísto, ane mod akale metóm, áyāle mod awē eédəə mwānyan awē

ányínεέ, éēhēlēē-se ádāη Dyöb áde éēnyīnēē. <sup>21</sup> Né-  
 zó, enén mbéndé chóó bébágé syánē; kénzée awě  
 adəá Dyöb ádāη kááηne mwānyaη.

## 5

### *Jone ad bad abe bédúbpé Krístəə bétómé nkōηsé áte*

<sup>1</sup> Kénzée awě adúbpe aá Yesue mó adé Ane awě  
 Dyöb Awógté, adii mwān a Dyöb. Kénzée-’ε awě  
 adəá sáá-a-mwān adəá’ kááηne mwān. <sup>2</sup> Nyaa echě  
 débíε’ε bán dedəá bán bé Dyöb edii nén bán syánē  
 dedəá Dyöb, dekoηge-’ε échē mbéndé. <sup>3</sup> Adāη  
 Dyöb adii áhíd éche mbéndé, éche mbéndé-’ε  
 éetōmtεnēé awúu áte syánē áhíd chó. <sup>4</sup> Kénzée awě  
 adé mwān a Dyöb atómé nkōηsé áte. Nzəm echě  
 atómé nkōηsé áte, edii nén, dedúbpe bán Yesue  
 mó adé Ane awě Dyöb Awógté. <sup>5</sup> Modmod ampée  
 eesaá awě atóme nkōηsé áte éetómēé mod awě  
 adúbpe aá Yesue adii Mwān a Dyöb.

### *Jone ahóbé bwēm é’láán abe é’bide Yesue mbóη*

<sup>6</sup> Yesu Krístəə ampě á nkōηsé. Bëndusén mó ne  
 mendíb boη ámbíd e pón dé echě áwédé á awog  
 nímē mekií mēnsyogé. Saké edusen é mendíb  
 chēmpen ēmbenléd ne mó, boη áde áwédé nímē  
 mekií mēnsyogé. Edəádāη éche Esáá chóó élúmte  
 syánē aá nén adé mbále, áyāle Edəádāη éche Esáá  
 éekalée metóm. <sup>7</sup> Nyaa édé éláán ábii mbále  
 tāηgεne Yesue. <sup>8</sup> Debíí mbále tāηgεne Yesue áyāle  
 Edəádāη élangé syánē, bëndusén mó ne mendíb,  
 ansyog-ke nímē mekií áde áwédé. Echén nyaa  
 éláán ésyāēl élúmte syánē bán Yesue adii Mwān a  
 Dyöb. <sup>9</sup> Ngáne dedúbpe mekan nímē bad béhóbeé,

kéchée éche Dyöb álângeé syánē étómténé etógnén abé tómaa mekan míme bad bélângeé syánē. Nén adé áyāle Dyöb dēn dōo álângeé syánē, tângene awe Mwän. <sup>10</sup> Kénzée awē adúbpe Mwän a Dyöb, abíi nén aá mímén mekan mésyāal médé mbále. Boŋ kénzée awē eedúbpe Dyöb, édii nêngáne ahóbe' aá Dyöb ádii nkal a metóm, áyāle eedúbpeé mekan míme Dyöb áhóbé tângene awe Mwän. <sup>11</sup> Chõm éche Dyöb álângeé syánē édii nén; abelé syánē dekudé alongé áde déemaá'. Adén alongé ádii alongé áde awe Mwän ábageé. <sup>12</sup> Kénzée awē adé nhóg ne Mwän a Dyöb akudé áde alongé, kénzée- 'ε awē eesē nhóg ne Mwän a Dyöb, eékudéé áde alongé.

*Déwõngen nhóg ne anítii  
ákud alongé áde déemaá'*

<sup>13</sup> Ntenle' nyé ábe nyédúbpe á dñn á Mwän a Dyöb, ábel boŋ nyébíi bán nyékudé alongé áde déemaá'. <sup>14</sup> Desumé nlém nén bán, kéchéé éche déhédné Dyöb ngáne ébõñnéde mó, abelé awóg syánē mekáne. <sup>15</sup> Ngáne débíi-'ε bán awóge' syánē áyāl e kéchéé éche déhédné mó, detângéné abíi bán abage syánē kéchéé éche déhédné mó.

<sup>16</sup> Nzé mod anyíne mwãnyañ abele mbéb míme méepiinéd mó kwéed, atângéné akánnéd mó. Dyöb débě ane mod alongé. Bad ábe rihóbeé meé nyékánned bédii bad ábe mbéb mímāb méebeléé boŋ échāb edāádāŋ éwé. Mbéb ídé míme míbele boŋ edāádāŋ éwé. Nzé mod abelé ene ndín e mbéb meehóbée meé nyékánned ane mod. <sup>17</sup> Mewusé mésyāal médii mbéb, boŋ donge dé mbéb áde áde déebelé boŋ edāádāŋ éwé.

<sup>18</sup> Debíi nén bán kénzée awě adé mwăn a Dyõb eébeleē mbéb, áyāle Mwăn a Dyõb akənge mó, Ane awě adé Ebébtéd eéheleē-’ε-sε ábel mó mbéb. <sup>19</sup> Debíi bán dedíi bán bé Dyõb debíi-’ε nén bán Ane awě adé Ebébtéd akamlan bad bésyāal ábe béebíi Dyõb. <sup>20</sup> Debíi nén bán Mwăn a Dyõb apedé á nkõsé-te abagé-’ε syánē nsõηten ábíi Dyõb á mbále. Dedé-’ε mod nhóg ne mó áyāle dedé mod nhóg ne awe Mwăn, Yesu Krístæ. Mwēnpēnaá adé Dyõb, mwēn-naá abage bad alongé áde déemaá’. <sup>21</sup> A-bānbān, nyéewóó’ dyamdyam ábel ne myõb mé metóm.

**Mel̥ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48